



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

Sa crèsia de Santu Ciriaco.

Tempus meda a oi ddoi fiant in Terralba ddus predis ca non si podiant biri. Unu de custus fiat arrannèsciu a aprontai de bociri s'àteru donendu dinai meda a ddus òminis malus de sa bidde issoru. Ma po fai crei ca issu non c'intressit cun sa bocidura de s'àteru predi, fiat partiu de sa diri de a innantis po andai in una biddixedda innui s'afestàt Santu Ciriaco, ca fiat su santu de sa bidde.

Perou de candu fiat lòmpiu in cussa bidde innui nci fiat sa festa, si fiat postu pentzamentu meda ca perunu podessit pentzai ca sa morti de su predi fessit stètia causada de issu. In prus si fiat postu pistighingius po su mali chi cussus òminis depiant fai a su predi po mori de issu.

Intzandus s'est postu a pregai meda a Santu Ciriaco, de sarvai s'àteru predi e dd'at promitiu de ddi fraigai una crèsia acanta de sa domu de su cumpàngiu e de di fai una festa dònna annu.

A mengianu chitzi est partiu conca a Terralba e a totus is traballadoris chi atobiàt in sa ia ddi domandàt:

- Nci funt noas in sa bidde?

Issus arraspundiant ca non ci fiat noa peruna.

Ma candu est lòmpiu in Terralba est andau a circai cussus òminis chi iat pagau po bociri su predi e custus dd'ant contau ca no iant pòtziu fai nudda poita in sa domu de su predi chi depiant bociri, a de noti, nci fiat totu su tempus sa luxi alluta fintzas a s'orbescidòrgiu e de foras s'intendiat stragatzu de genti chi arriat, de pratus e de tassas. Custus sonus arribànt fintzas a sa ia.

Su predi malu candu at intèndiu totu custa stòria s'est ingenugau torrendu gràtzias a Santu Ciriaco de su chi iat fatu. Apustis est andau de s'àteru predi po ddi contai totu su mali chi ddi boliat fai ma su cumpàngiu dd'at arraspustu ca cussa noti fiat andau a si crocai chitzi meda e ca in domu sua non ddoi fiat nemus.

Intzandus is ddus predis si funt imprassaus e ant detzìdiu de fraigai in paris sa crèsia a Santu Ciriaco acanta de sa domu innui fiat sutzèdiu su miràculu. Po custu motivu dònna annu s'otu de su mesi de austu ddi faint sa festa.

Sa crèsia de Santu Ciriaco s'agatat in fundu de sa bidda de Terralba, pròpriu innui làcanat cun su sartu e incumentzat su padenti.